

Na osnovu člana 100. stav 2., a u vezi sa članom 135. stav 1., Zakona o igrama na sreću („Službene novine Federacije BiH“, br. 48/15 i 60/15), federalna ministrica finansija - federalna ministrica financija donosi

## **PRAVILNIK**

### **O PROSTORNIM, TEHNIČKIM I DRUGIM USLOVIMA ZA PRIREĐIVANJE IGARA NA SREĆU NA AUTOMATIMA, USLOVIMA TEHNIČKE ISPRAVNOSTI AUTOMATA, TEHNIČKOM PREGLEDU AUTOMATA I CERTIFICIRANJU AUTOMATA I RNG**

#### **I. OPĆE ODREDBE**

##### **Član 1.**

Ovim Pravilnikom se propisuju prostorni, tehnički i drugi uslovi za priređivanje igara na sreću na automatima, uslovi tehničke ispravnosti automata, tehnički pregled automata, uslovi koje moraju ispunjavati pravna lica za dobivanje odobrenja za obavljanje tehničkog pregleda i izdavanje potvrda (atesta) o njihovoj tehničkoj ispravnosti, certificiranje automata i RNG kao i uslovi koje moraju ispunjavati pravna lica za dobivanje ovlaštenja za certificiranje automata i RNG.

##### **Član 2.**

U smislu ovog Pravilnika pojedini pojmovi imaju sljedeće značenje:

- (1) Automat za igre na sreću jest elektromehanički ili elektronski uređaj programski upravljani na kojem igrači uplatom određenog iznosa imaju mogućnost sticanja dobitka koji ovisi o slučaju ili nekom drugom neizvjesnom događaju, a koji mora imati elektronske ili mehaničke bročanike koji bilježe promet automata.
- (2) Automat klub je posebno uređen prostor za priređivanje igara na sreću na automatima, koji posjeduje vlastiti ulaz ili se radi o prostoru koji se smatra zasebnom cjelinom, a za koje priređivač posjeduje dokaz o vlasništvu ili pravu korištenja.
- (3) RNG (RNG Random Number Generator) je certificiran hardverski ili softverski uređaj koji na osnovu slučajnih uzoraka generira slučajne, potpuno nezavisne i nepredvidive nizove brojeva, simbola ili događaja u igrama na sreću klađenja iz člana 78. Zakona o igrama na sreću („Službene novine Federacije BiH“, br. 48/15 i 60/15, u daljem tekstu: Zakon).
- (4) Ovlašteni laboratorij je pravno lice koje posjeduje odobrenje Federalnog ministarstva finansija – Federalnog ministarstva financija (u daljem tekstu: Ministarstvo) za certificiranje automata za igre na sreću i RNG, izdato u skladu sa Zakonom i ovim Pravilnikom.
- (5) Ovlašteno pravno lice je pravno lice koje posjeduje odobrenje Ministarstva za obavljanje tehničkog pregleda automata za igre na sreću.
- (6) Centralni računarski sistem priređivača podrazumijeva povezivanje automata u jednom automat klubu na izdvojeni centralni server unutar automat kluba (u daljem tekstu: centralni server).

- (7) Sistem za on-line nadzor podrazumijeva uvezivanje svakog pojedinačnog automata priređivača sa informacionim sistemom Središnjeg ureda Porezne uprave Federacije Bosne i Hercegovine (u daljem tekstu: Središnji ured Porezne uprave), na način koji osigurava izdvojeno centralno umrežavanje svih automata na jednoj lokaciji sa ciljem kontrole podataka o ostvarenom prometu i izvještavanja o drugim događajima na automatu (kvarovi, otvaranje glavnih vrata, dobivanje jack-pota) za sve priključene automate.

## II. PROSTORNI, TEHNIČKI I DRUGI USLOVI ZA PRIREĐIVANJE IGARA NA SREĆU NA AUTOMATIMA

### Član 3.

- (1) Igre na sreću na automatima priređuju se na osnovu odobrenja Ministarstva, u automat klubovima sa prostorom za igru površine od najmanje 50 m<sup>2</sup>, u kojima je u smješteno najmanje 20 tehnički ispravnih automata za igre na sreću.
- (2) Izuzetno, u skladu sa Zakonom i ovim Pravilnikom, Lutrija Bosne i Hercegovine može priređivati igre na sreću na automatima i na uplatnim mjestima u kojima se priređuju i klasične igre na sreću, gdje je smješteno manje od 20 automata i čija površina prostora može biti manja od 50m<sup>2</sup>.

### Član 4.

- (1) Automati mogu biti u vlasništvu priređivača igara na sreću na automatima (u daljem tekstu: priređivača) ili iznajmljeni. Vlasništvo se dokazuje računom ili kupoprodajnim ugovorom, dok se u slučaju najma automata, Ministarstvu dostavlja ugovor zaključen sa najmodavcem.<sup>1</sup>
- (2) *Uz dokaze iz stava (1) ovog člana, dostavlja se certifikat o usklađenosti automata, kao i ostala dokumentacija o tehničkim performansama automata na zahtjev Ministarstva.*<sup>2</sup>
- (3) Ako se automat uvozi, prilikom podnošenja zahtjeva za stavljanje u upotrebu, priređivač je dužan Ministarstvu pored dokaza da automat nije stariji od godinu dana od dana njegove proizvodnje, dostaviti i uvožnu carinsku deklaraciju.

### Član 5.

- (1) Proizvođač automata i priređivač mogu automate prodati ili iznajmiti samo priređivaču koji posjeduje odobrenje za priređivanje igara na sreću na automatima.
- (2) U slučaju kada priređivač proda svoje automate koje je na osnovu odobrenja Ministarstva povukao iz upotrebe, dužan je Ministarstvu dostaviti podatke o kupcu automata (naziv i sjedište pravnog lica).

### Član 6.

- (1) Priređivač može u periodu važenja odobrenja, podnijeti Ministarstvu zahtjev za preseljenje automat kluba na novu lokaciju.
- (2) Zahtjev iz stava 1. ovog člana mora sadržavati podatke o nazivu i Jedinstvenom identifikacionom broju (JIB-u) priređivača, adresi automat kluba na kojoj su

<sup>1</sup> Službene novine Federacije BiH broj 63/19

<sup>2</sup> Službene novine Federacije BiH broj 49/22

automati bili u upotrebi i novoj lokaciji na koju se stavljaju u upotrebu, kao i razloge preseljenja automat kluba.

(3) Uz zahtjev iz stava 1. ovog člana, priređivač je dužan dostaviti:

- ovjerenu izjavu o ispunjenosti prostornih i tehničkih uslova za poslovni prostor na koji se premještaju automati (data pod punom materijalnom i krivičnom odgovornošću),
- spisak automata koji se premještaju na novu lokaciju, koji sadrži podatke o nazivu proizvođača, vrsti i serijskom broju, te mjesecu i godini proizvodnje automata,
- dokaz o vlasništvu ili pravu korištenja prostora u kome će se priređivati igre na sreću na automatima,
- saglasnost za obavljanje djelatnosti igara na sreću na novoj lokaciji, izdata od strane nadležne općinske službe na čijoj se teritoriji nalazi nova lokacija (samo ukoliko se prostor nalazi u objektu kolektivnog stanovanja),
- odgovarajući akt nadležne općinske službe na čijoj se teritoriji nalazi nova lokacija (uvjerenje, potvrda, izvod iz katastarskog plana ili drugi relevantan dokument), kojim se dokazuje da se poslovni prostor novog automat kluba ne nalazi u na udaljenosti manjoj od 100 m od vjerskih objekata, te osnovnih i srednjih škola.

#### **Član 7.**

- (1) Priređivač je dužan u svakom automat klubu osigurati tehničke preduvjete za nesmetano prikupljanje i kontrolu svih podataka iz automata u realnom vremenu, te također osigurati zaštitu plombiranih mehanizama postavljenih od strane ovlaštenih službenika Porezne uprave Federacije Bosne i Hercegovine (u daljem tekstu: ovlašteni službenik).
- (2) U cilju osiguranja tehničkih preduslova za on-line nadzor automata koji će omogućiti dostavljanje podataka u realnom vremenu, priređivač je dužan prema uputama Središnjeg ureda Porezne uprave osigurati svu potrebnu opremu i dodatni materijal za instalaciju.
- (3) Središnji ured Porezne uprave će dati sve potrebne upute priređivačima u vezi sa načinom uspostave sistema za on-line nadzor automata i poduzeti sve potrebne mjere i aktivnosti za stvaranje tehničkih preduslova koji će omogućiti prilagođavanje i nesmetano funkcionisanje svog informacionog sistema u skladu sa Zakonom i ovim Pravilnikom.

#### **(1) Član 8.**

- (2) Priređivač je dužan u svom centralnom računarskom sistemu osigurati adekvatnu pohranu svih podataka o radu automata.
- (3) Svaki automat koji priređivač u skladu sa Zakonom i ovim Pravilnikom povezuje u centralni računarski sistem, mora biti usklađen za komunikaciju sa informacionim sistemom Središnjeg ureda Porezne uprave.

#### **Član 9.**

- (1) Svi automati za igre na sreću jednog priređivača koji su u upotrebi, mogu za potrebe centralnog računarskog sistema i sistema za on-line nadzor koristiti

najmanje jedan od normiranih protokola priznatih od strane međunarodnog Udruženja za norme u igrama na sreću (GSA – Gaming Standard Association) kao što su:

- G2S (Game to System),
  - SAS (Slot Accounting System)
- (2) Automati koji posjeduju protokol iz stava 1. alineja 2. ovog člana, mogu se uvezati u sistem za on-line nadzor samo ako posjeduju najmanje dva izlazna kanala.
- (3) Automati koji ne posjeduju jedan od protokola iz st. 1. i 2. ovog člana, mogu se uvezati u sistem za on-line nadzor samo na način definiran tehničkim uputama Središnjeg ureda Porezne uprave datim priređivaču.
- (4) Ako se informacije s automata prema sistemu za on-line nadzor ne dostavljaju direktnom komunikacijom, automat mora imati programirani uređaj – sučelje (interface) za komunikaciju između automata i informacionog sistema Središnjeg ureda Porezne uprave, koji će omogućiti nepromjenjivost podataka.
- (5) Uređaj (interface) iz stava 4. ovog člana mora biti ugrađen unutar sigurne zone automata i biti zaštićen od neovlaštenog pristupa samouništavajućom plombom koju postavljaju ovlašteni službenici.
- (6) Za potrebe sistema za on-line nadzor, na izdvojenom centralnom serveru unutar automat kluba, nalazit će se softverska komponenta i certifikat izdat od strane Središnjeg ureda Porezne uprave, a koji služe za identifikaciju automat kluba i automata.

#### **Član 10.**

U zavisnosti od vrste automata koji se uvezuje, on-line nadzor mora omogućiti prikupljanje sljedećih podataka:

- datum i vrijeme te identitet automata na kojem je generiran podatak,
- ulaz - izlaz (cash in- cash out),
- ulog - dobitak (bet – win),
- žetone koji se ubacuju u posebnu kutiju (drop),
- ulaz žetona,
- izlaz žetona,
- ulaz novčanica (ukupna vrijednost svih prihvaćenih novčanica),
- ulaz listića,
- izlaz listića,
- jack-pot dobitke
- ručne isplate,
- poništene kredite
- prekid napajanja,
- otvaranje i zatvaranje vrata.

### **Član 11.**

Centralni računarski sistem priređivača mora osigurati sljedeće sigurnosne uslove:

- osiguranje nepromjenjivosti prijenosa i pohrane podataka s automata na centralni računarski sistem,
- zabranu izmjene podataka između automata i centralnog računarskog sistema uz osiguranje primjerenih mjere zaštite.

## **III. USLOVI TEHNIČKE ISPRAVNOSTI AUTOMATA**

### **Član 12.**

- (1) Svi automati za igre na sreću koji su u upotrebi, moraju imati potvrdu o tehničkoj ispravnosti i biti plombirani od strane ovlaštenih službenika.
- (2) Automati moraju biti tako konstruirani da sve transakcije prikazuju isključivo u konvertibilnim markama (KM), izuzev automata priređivača koji u skladu sa Zakonom i odobrenjem Ministarstva priređuju igre na sreću u kasinu.

### **Član 13.**

Automati koji se na osnovu odobrenja Ministarstva prvi put stavljaju u upotrebu na teritoriji Federacije Bosne i Hercegovine (u daljem tekstu: Federacija), ne smiju u trenutku podnošenja zahtjeva za stavljanje u upotrebu biti stariji od godinu dana od dana njihove proizvodnje do dana podnošenja zahtjeva za izdavanje odobrenja. Godina i mjesec proizvodnje automata mora biti iskazana na originalnom računu i na kućištu automata.

### **Član 14.**

- (1) Automat može sadržavati samo one igre koje su opisane u uputstvima za upotrebu.
- (2) Programsku ploču automata ugrađuje proizvođač, a mora omogućiti samo ono što je opisano u uputstvima za upotrebu, te što je sadržano u tehničkom opisu igre.
- (3) Rezultat igre na automatima mora zavisiti isključivo od budućeg neizvjesnog događaja koji nije mogao biti unaprijed poznat niti se mogao unaprijed predvidjeti.

### **Član 15.**

Automati moraju biti tako konstruirani da zbog prekida električnog napajanja ne dođe do brisanja i gubitka podataka koji su pohranjeni u njihovoj memoriji, a odnose se na pojedine igre (uplate, bonusi, faze igre), te stanje mehaničkih ili elektronskih brojanika na automatu.

### **Član 16.**

- (1) Automati za igre na sreću koji se stavljaju u upotrebu i koji su zatečeni u upotrebi na teritoriji Federacije na dan stupanja na snagu ovog Pravilnika, moraju imati mogućnost da putem elektronskih ili mehaničkih brojanika bilježe najmanje sljedeće podatke:
  - ulaz - izlaz (cash in- cash out),

- ulog - dobitak (bet – win),
  - jack-pot dobitke.
- (2) Kada su automati u skladu sa Zakonom povezani radi jack-pot dobitka, tada se brojčanik jack-pot dobitka može nalaziti na automatu, ili zaslonu (displayu) povezanom sa centralnim serverom priređivača ili se može očitati sa servera priređivača.

#### **Član 17.**

- (1) U slučaju oštećenja ili kvara automata priređivač je dužan:
- u roku od petnaest dana otkloniti kvar na automatu, ili
  - pokvareni automat u roku od trideset dana zamijeniti tehnički ispravnim automatom koji ispunjava sve propisane uslove tehničke ispravnosti automata.
- (2) U slučajevima iz stava 1. ovog člana, priređivač je dužan u roku od trideset dana izvijestiti Ministarstvo o otklanjanju kvara pri čemu se dostavlja zapisnik ovlaštenog pravnog lica i servisera ili podnijeti zahtjev Ministarstvu za izdavanje odobrenja za postavljanje zamjenskog automata.
- (3) U slučaju kada su kvar ili oštećenje automata takve prirode da popravak zahtijeva skidanje plombe sa automata, popravak se obavlja nakon što ovlašteni službenik skine plombu sa automata.
- (4) Središnji ured Porezne uprave je dužan na pismeni zahtjev priređivača osigurati prisustvo ovlaštenog službenika u roku od 48 sati od dana prijema zahtjeva.
- (5) Nakon otklanjanja oštećenja ili kvara ovlašteno pravno lice obavlja tehnički pregled automata.
- (6) O obavljenom tehničkom pregledu automata ovlašteno pravno lice sastavlja zapisnik i izdaje uvjerenje o tehničkoj ispravnosti (atest) te označava mjesta na automatu koja će ovlašteni službenik plombirati.
- (7) Vraćanje na početno stanje (resetiranje) nije dopušteno bez prisutnosti ovlaštenog službenika i zaposlenika ovlaštenog pravnog lica.
- (8) Kod popravka manjih kvarova koji ne utječu na tehničku i funkcionalnu promjenu automata nije potreban tehnički pregled.

#### **Član 18.**

Pristup sklopovima unutar automata dopušten je:

- ovlaštenim službenicima
- zaposlenicima ovlaštenog pravnog lica
- zaposlenicima priređivača i servisera uz prisustvo zaposlenika ovlaštenog pravnog lica koje obavlja tehnički pregled ili ovlaštenog službenika.

#### **IV. TEHNIČKI PREGLED AUTOMATA**

#### **Član 19.**

Tehničkim pregledom utvrđuje se ispravnost automata u pogledu:

- usaglašenosti automata sa njegovom tehničkom dokumentacijom
- sigurnosti rada i funkcionisanja uređaja za uključivanje i isključivanje automata iz pogona
- ispravnosti kontrolnih uređaja i uređaja za upravljanje i igranje
- *usaglašenost automata u skladu sa članom 98. stav (2) Zakona*<sup>3</sup>
- drugih uslova tehničke ispravnosti propisanih Zakonom i ovim Pravilnikom.

#### Član 20.

Tehničkom pregledu podliježu svi automati, i to prilikom:

- prvog stavljanja u upotrebu
- podnošenja zahtjeva za produženje odobrenja, a najkasnije u roku od dvije godine od obavljenog prethodnog pregleda
- vanrednog pregleda automata na zahtjev Ministarstva
- vanrednog pregleda automata na zahtjev priređivača
- *izmjena softverskih i/ili funkcionalnih karakteristika automata*<sup>4</sup>.

#### Član 21.

- (1) Tehnički pregled automata iz člana 20. al. *1, 2, 4. i 5*<sup>5</sup>. obavlja se na zahtjev priređivača igara na sreću.
- (2) Uz zahtjev iz stava 1. ovog člana, priređivač prilaže tehničku dokumentaciju proizvođača.
- (3) Ukoliko ocijeni da postoji potreba ili *na zahtjev Porezne uprave*<sup>6</sup>, ministarstvo može u svakom trenutku podnijeti zahtjev za tehnički pregled ispravnosti pojedinog automata koji je već u upotrebi s važećom potvrdom o tehničkoj ispravnosti.
- (4) Troškove tehničkog pregleda snosi priređivač igara na sreću na automatima.

#### Član 22.

- (1) Tehnički pregled automata obavlja se u poslovnom prostoru priređivača ili u poslovnom prostoru ovlaštenog pravnog lica.
- (2) O tehničkom pregledu automata vodi se zapisnik koji se sastavlja u najmanje tri primjerka, od kojih se dva obavezno uručuju priređivaču.
- (3) Zapisnik iz stava 2. ovog člana sadrži najmanje sljedeće podatke:
  - naziv firme, Jedinstveni identifikacioni broj (JIB) priređivača i adresu sjedišta pravnog lica koje obavlja tehnički pregled,
  - mjesto i datum obavljanja tehničkog pregleda,
  - poslovno ime i sjedište priređivača,

<sup>3</sup> Službene novine Federacije BiH broj 63/19

<sup>4</sup> Službene novine Federacije BiH broj 49/22

<sup>5</sup> Službene novine Federacije BiH broj 49/22

<sup>6</sup> Službene novine Federacije BiH broj 63/19

- adresu automat kluba na kojoj se automati koji su predmet tehničkog pregleda stavljaju u upotrebu
  - podatke o proizvođaču, vrsti i tipu, mjesecu i godini proizvodnje i serijskom broju automata
  - tehničke karakteristike automata kao i popis medija za pohranu podataka
  - podatke o posjedovanju i vrsti certifikata o usklađenosti za određeni tip automata
  - podatke o uređajima i opremi korištenim pri obavljanju tehničkog pregleda,
  - podatke o izvršenoj provjeri ispravnosti rada brojčanika, te zapis o konačnom stanju svih brojčanika nakon provjere,
  - *utvrđen procenat programiranih kombinacija iz čl. 98. Zakona, za svaki automat<sup>7</sup>*
  - naznaku u vezi sa mjestima na automatu koja treba plombirati
  - opis izvršenih provjera ispravnosti propisanih u članu 19. stav 1. ovog Pravilnika
  - datum i broj izvještaja o prethodnom tehničkom pregledu automata, ako je bio obavljen.
- (4) Zapisnik o tehničkom pregledu potpisuje odgovorno lice u ovlaštenom pravnom licu kao i zaposlenik koji je obavio pregled.
- (5) *Zapisnik o tehničkom pregledu iz člana 21. stav (3) ovog Pravilnika, dostavlja se Ministarstvu u roku od 5 dana od dana sačinjavanja.<sup>8</sup>*

### Član 23.

Na osnovu podataka dobivenih prilikom obavljanja tehničkog pregleda koji su konstatovani u zapisniku, ovlašteno pravno lice izdaje potvrdu o tehničkoj ispravnosti automata (atest).

## V. USLOVI ZA IZDAVANJE ODOBRENJA ZA OBAVLJANJE TEHNIČKOG PREGLEDA AUTOMATA

### Član 24.

- (1) Tehnički pregled automata u skladu sa Zakonom i ovim Pravilnikom, obavljaju ovlaštena pravna lica, na osnovu odobrenja Ministarstva koje se izdaje na period od pet godina. Odobrenje se može produžiti pod uslovima propisanim ovim Pravilnikom.
- (2) Ovlaštena pravna lica moraju osigurati nezavisnost i objektivnost u svom poslovanju, čuvati poslovnu tajnu, te snositi odgovornost za obavljene posao.
- (3) Odgovorno lice i zaposlenici ovlaštenih pravnih lica moraju posjedovati odgovarajući nivo znanja o propisima iz oblasti priređivanja igara na sreću.

<sup>7</sup> Službene novine Federacije BiH broj 49/22

<sup>8</sup> Službene novine Federacije BiH broj 63/19



## Član 25.

(1) Uz zahtjev za izdavanje odobrenja za obavljanje tehničkog pregleda iz člana 24. stav 1. ovog Pravilnika, pravno lice prilaže sljedeću dokumentaciju:

- rješenje o registraciji pravnog lica, kojim se dokazuje da je registrovano za obavljanje djelatnosti "Tehničko ispitivanje i analiza - Šifra djelatnosti 71.20"<sup>99</sup>
- dokaz o posjedovanju odgovarajuće opreme za kontrolisanje ili tehnički pregled automata (npr. digitalni i analogni instrumenti za kontrolu mjera zaštite od indirektnog i direktnog dodira dijelova pod naponom, kompleti za mjerenje pojačanja elektronskih sklopova, osciloskopi, logik-testeri i drugi odgovarajući instrumenti za utvrđivanje tehničke ispravnosti automata),
- detaljne podatke o ukupnom broju i stručnoj osposobljenosti zaposlenika za obavljanje tehničkog pregleda, uz uslov da su zaposlene najmanje dvije osobe ovlaštene za obavljanje tehničkog pregleda sa VSS - stručnom spremom tehničke struke,
- dokaz da osnivači i odgovorne osobe pravnog lica nisu osuđivane za krivična djela, osim za krivična djela iz oblasti saobraćaja,
- dokaz da raspolaže adekvatnim poslovnim prostorom u kojem može obavljati tehnički pregled (dokaz o vlasništvu ili pravu korištenja),
- dokaz da raspolaže adekvatnim vozilima za obavljanje tehničkog pregleda na terenu (dokaz o vlasništvu ili pravu korištenja)
- ovjerenu izjavu odgovornog lica datu pod punom materijalnom i krivičnom odgovornošću, kojom se potvrđuje da se vlasnici i zaposlenici ne bave priređivanjem igara na sreću, iznajmljivanjem automata, da nisu proizvođači, serviseri, dobavljači ili ovlašteni zastupnici nekog proizvođača, te da ne posjeduju osnivački udio u vlasništvu tih pravnih lica.

(2) Na zahtjev ovlaštenog pravnog lica, odobrenje iz stava 1. ovog člana se može produžiti. Zahtjev za produženje odobrenja podnosi se Ministarstvu najkasnije u roku 30 dana prije isteka važećeg odobrenja. Uz zahtjev se prilažu dokazi iz stava 1. ovog člana.

## Član 26.

(1) Ministarstvo će ovlaštenim pravnim licima oduzeti odobrenje iz stava 1. ovog člana, ukoliko utvrdi da:

- djelatnost tehničkog pregleda ne obavljaju u skladu s odredbama Zakona i ovog Pravilnika,
- nestručno obavljaju djelatnost tehničkog pregleda,
- podaci sadržani u zapisniku o obavljenom tehničkom pregledu nisu utvrđeni neposrednim uvidom u stanje automata,
- zloupotrebljavaju ovlaštenje Ministarstva.

---

<sup>99</sup> Službene novine Federacije BiH broj 72/16

- (2) U slučaju oduzimanja odobrenja iz razloga propisanih u stavu 1. ovog člana, ovlašteno pravno lice trajno gubi pravo na obavljanje tehničkog pregleda automata na teritoriji Federacije.

#### Član 27.

Ovlašteno pravno lice je dužno svakih šest mjeseci od dana izdavanja odobrenja Ministarstvu dostavljati Izvještaj o obavljenim tehničkim pregledima i izdatim uvjerenjima o tehničkoj ispravnosti automata za prethodnih šest mjeseci.

#### Član 28.

- (1) Ovlašteno pravno lice je dužno da vodi evidenciju o obavljenim tehničkim pregledima i evidenciju o izdatim potvrdama o tehničkoj ispravnosti automata.

- (2) Evidencija o obavljenim tehničkim pregledima sadrži:

- naziv firme, Jedinstveni identifikacioni broj (JIB) i adresu sjedišta pravnog lica koje obavlja tehnički pregled,
- redni broj pregleda,
- datum podnošenja zahtjeva za tehnički pregled,
- podatke o automatima (proizvođač, vrsta i tip, mjesec i godina proizvodnje i serijski broj automata)
- adresu automat kluba na kojoj se automati koji su predmet tehničkog pregleda stavljaju u upotrebu
- rezultat tehničkog pregleda automata (ispravan/nije ispravan).
- Evidencija o izdatim potvrdama o tehničkoj ispravnosti automata sadrži:
  - naziv firme, Jedinstveni identifikacioni broj (JIB) i adresu sjedišta pravnog lica kome je izdata potvrda,
  - redni broj potvrde,
  - datum izdavanja potvrde o tehničkoj ispravnosti,
  - *datum izvršenih servisiranja automata i podaci o serviseru,*
  - *datum i opis izvršenih izmjena softverskih i funkcionalnih karakteristika automata.*<sup>10</sup>

- (3) Dokumentacija vezana uz obavljanje tehničkog pregleda čuva se najmanje pet godina od dana obavljanja tehničkog pregleda.

- (4) Ovlašteno pravno lice je dužno na zahtjev Ministarstva dostaviti sve tražene podatke koji su sadržani u evidencijama.

## VI. CERTIFICIRANJE AUTOMATA I RNG

#### Član 29.

- (1) Svi tipovi automata za igre na sreću koji su u upotrebi ili se prvi put stavljaju u upotrebu, kao i RNG koji se koriste u sistemima za igre na sreću klađenja iz člana 78. Zakona, moraju biti certificirani.

---

<sup>10</sup> Službene novine Federacije BiH broj 49/22

- (2) Certifikat o usklađenosti za određeni tip automata i RNG-a je dokument koji se izdaje na zahtjev proizvođača, a kojim se potvrđuje usklađenost tog tipa automata i RNG-a sa uslovima propisanim Zakonom i ovim Pravilnikom
- (3) Certifikat o usklađenosti za određeni tip automata mora sadržavati tehnički izvještaj o izvršenom testiranju automata.

### Član 30.

- (1) Certificiranje automata i RNG može obavljati samo ovlašteni laboratorij koji ima odobrenje Ministarstva.
- (2) Certifikate o usklađenosti i tehničke izvještaje o izvršenom testiranju automata (test report), ovlašteni laboratorij dužan je dostaviti Ministarstvu u pisanom obliku *ili elektronskom obliku u vidu prenosivog memorijskog uređaja*<sup>11</sup> na jednom od jezika u službenoj upotrebi u Federaciji.
- (3) Izuzetno, za tipove automata koji se već nalaze u upotrebi, Ministarstvo će uvažiti kao validan certifikat koji je izdat prije stupanja na snagu ovog Pravilnika, ako je isti izdalo pravno lice akreditirano od strane priznatog akreditacionog tijela u zemlji ili inostranstvu.

### Član 31.

Certifikat o usklađenosti mora sadržavati:

- naziv ovlaštenog laboratorija
- podatke o proizvođaču automata ili RNG
- predmet testiranja koji uključuje i ispitivanje slučajnosti igre (random)
- model i oznaku programa
- oznaku verzije automata ili RNG
- broj certifikata i datum izdavanja
- konačan nalaz o usklađenosti tipa automata ili RNG.

### Član 32.

- (1) Certifikat o usklađenosti pojedinog tipa automata mora u prilogu sadržavati izvještaj o obavljenom testiranju automata (test report).
- (2) Izvještaj o obavljenom testiranju pojedinog tipa automata mora sadržavati:
  - testiranje hardvera, broj modela i fotografiju automata,
  - naziv svake pojedinačne igre,
  - ispitivanje programske podrške odnosno softvera, kao i originalnog medija za pohranu
  - provjeru vjerovatnoće dobitka u postocima od uplate igrača
  - ispitivanje slučajnosti igre (random generator),
  - precizno opisana mjesta i priključke koje je potrebno zaštititi od neovlaštenog pristupa.

---

<sup>11</sup> Službene novine Federacije BiH broj 49/22

## VII. USLOVI ZA IZDAVANJE ODOBRENJA ZA OBAVLJANJE CERTIFICIRANJA AUTOMATA I RNG GENERATOR

### Član 33.

Certificiranje automata koji se stavljaju u upotrebu i RNG koji se koriste u sistemima za igre na sreću klađenja iz člana 78. Zakona, mogu obavljati ovlašteni domaći ili međunarodni laboratoriji koji posjeduju odobrenje Ministarstva.

### Član 34.

- (1) Uz zahtjev za izdavanje odobrenja iz člana 34. ovog Pravilnika, ovlašteni laboratoriji dostavljaju sljedeću dokumentaciju:
  - podatke o nazivu firme i sjedištu društva,
  - certifikat o posjedovanju važećeg standarda EN ISO/IEC 17025, izdat od strane priznatog akreditacionog tijela u zemlji ili inostranstvu
  - dokumentaciju kojom dokazuju posjedovanje adekvatne opreme i uređaja za ispitivanje usklađenosti automata i RNG-a
  - detaljne podatke o ukupnom broju i stručnoj osposobljenosti zaposlenika
  - odobrenja/ovlaštenja izdata od strane nadležnih organa svih država u kojima već posjeduju odobrenje za obavljanje certificiranja (ukoliko posjeduju)
  - popis svih proizvođača za koje obavljaju certificiranje,
- jedan primjerak certifikata i izvještaja o obavljenom testiranju automata - test report (ukoliko posjeduju)
- ovjerenu izjavu odgovornog lica datu pod punom materijalnom i krivičnom odgovornošću, kojom se potvrđuje da se vlasnici i zaposlenici ne bave priređivanjem igara na sreću, iznajmljivanjem automata, da nisu proizvođači, serviseri, dobavljači ili ovlašteni zastupnici nekog proizvođača, te da ne posjeduju osnivački udio u vlasništvu tih pravnih lica.
- (2) Svi dokumenti iz stava 1. ovog člana dostavljaju se u originalu ili ovjerenoj fotokopiji koja ne smije biti starija od 30 dana.
- (3) Uz svaki dokument iz stava 1. ovog člana koji se dostavi na nekom stranom jeziku, potrebno je priložiti ovjeren prijevod sudskog tumača na jedan od službenih jezika u Federaciji.
- (4) Ako utvrdi da ovlašteni laboratorij ispunjava sve uvjete iz Zakona i ovog Pravilnika, Ministarstvo će izdati odobrenje za certificiranje automata i RNG generatora.
- (5) U slučaju nastanka okolnosti koje su utjecale na promjenu podataka iz stava 2. al. 1., 2., 3. i 8. ovoga člana, ovlašteni laboratorij je dužan o istom izvijestiti Ministarstvo u roku od 30 dana od dana promjene podataka.

### Član 35.

Ovlašteni laboratoriji su dužni saradivati sa Ministarstvom i pružati stručne usluge vezane za primjene novih tehnologija automata i sistema za igre na sreću, kao i usluge stručnog usavršavanja zaposlenika ovlaštenih pravnih osoba.

### **Član 36.**

Ministarstvo može oduzeti odobrenje izdato ovlaštenom laboratoriju, ukoliko se naknadno utvrdi da isti postupa suprotno odredbama Zakona i ovog Pravilnika.

## VIII. PRIJELAZNE I ZAVRŠNE ODREDBE

### **Član 37.**

- (1) Pravna lica koja na dan stupanja na snagu ovog Pravilnika posjeduju odobrenje (ovlaštenje) Ministarstva za obavljanje tehničkog pregleda na teritoriji Federacije izdato u skladu sa Zakonom o igrama na sreću („Službene novine FBiH“, br. 01/02 i 40/10), mogu u skladu sa izdatim odobrenjem nastaviti obavljati odobrenu djelatnost najduže 6 mjeseci od dana stupanja na snagu ovog Pravilnika.
- (2) Pravna lica iz stava 1. ovog člana kao i sva druga pravna lica koja imaju sjedište na teritoriji Bosne i Hercegovine, imaju pravo podnijeti zahtjev za izdavanje odobrenja za obavljanje poslova tehničkog pregleda automata, na način kako je to propisano ovim Pravilnikom.

### **Član 38.**

Automati koji se nalaze u upotrebi na osnovu odobrenja Ministarstva izdatih u skladu sa propisima koji su važili do stupanja na snagu ovog Pravilnika, mogu ostati u upotrebi ako se u roku od 6 mjeseci od dana stupanja na snagu ovog Pravilnika usklade sa tehničkim uslovima i uslovima tehničke ispravnosti automata propisanim Zakonom i ovim Pravilnikom, i ako su usklađeni za komunikaciju sa informacionim sistemom Porezne uprave.

### **Član 39.**

Odredbe člana 9. ovog Pravilnika ne odnose se na automate u automat klubovima priređivača, koji su do dana stupanja na snagu ovog Pravilnika prema uputama Središnjeg ureda Porezne uprave, uvezani u sistem za on-line nadzor i za koje je izdata potvrda/uvjerenje o uvezivanju.

### **Član 40.**

Plombiranje automata na način propisan ovim Pravilnikom, ovlašteni službenici će vršiti počevši od 01.09.2016.godine.

### **Član 41.**

Ovaj Pravilnik stupa na snagu narednog dana od dana objavljivanja u „Službenim novinama Federacije BiH“.